

Procjena analitičara DPC-a i Atlantske inicijative

Međuetničko nasilje
prijeti BiH

**Autori
izvještaja:**
Vlado Azinović,
Kurt Bassuener i
Bodo Weber

U studiji se procjenjuje da fudbalski huliganizam, maloljetnička delinkvencija, manjinski povratak, te terorizam i islamska radikalizacija mogu biti varnice za međuetničko nasilje

“Svi međunarodni zvaničnici na području sigurnosti, sa kojima su autori izvještaja razgovarali, vjeruju da bi pripadnici privatnih sigurnosnih agencija među prvima uzeli oružje u ruke u slučaju nasilnog etničkog konflikta”, navodi se u juče objavljenoj Procjeni potencijala za obnavljanje etničkog nasilja u BiH, koju su sačinili Vlado Azinović, Kurt Bassuener i Bodo Weber (Atlantic Initiative, Democratization Policy Council).

Privatne agencije

“Osoblje privatnih sigurnosnih agencija moglo bi da ima značajan uticaj, ako bi bilo aktivirano u ranim fazama obnovljenog etničkog konflikta. Među ovim osobljem - posebno veteranima specijalnih snaga i obavještajnih službi - nalaze se najbolje obučeni pojedinci kako unutar javnih, tako i unutar privatnih agencija. Oni su dobro opremljeni i dostupna su im oružja koja znaju da koriste i kada njihove agencije to oružje (makar zvanično) ne posjeduju”, navodi se u izvještaju.

Političke elite i većina medi-

ja su aktivno sudjelovali u radikaliziranju političkog i javnog diskursa u BiH u protekle tri godine. Analiza ukazuje na sve učestalije dovodenje u pitanje same države BiH. Uprkos tome ili se rijetko ili uopšte činjenično ne procjenjuje fizički, društveni i politički potencijal konflikta u savremenoj BiH. Izgleda da se strah u stanovništvu

**UPOZORENJE
Svaki peti građanin nezakonito posjeduje oružje**

povećava: o tome se govori u javnosti, uz poređenje sa devedesetim godinama rata u BiH. Iako takav rat nije moguć, pogrešno je zaključiti da nije moguće ni organizovano nasilje, upozoravaju autori.

Nestabilan miks

Do značajnog međuetničkog nasilja u BiH može doći i spontano i instrumentalizacijom događaja. U studiji se procjenjuje nekoliko mogućih varnica za takvo izbijanje međuetničkog nasilja. To su, između


| Oružje u brojkama | |
|-------------------|---------------------------------------|
| 3.275 | komada teškog naoružanja |
| 89.625 | komada ličnog i lakog naoružanja |
| 29.246 | tona municije |
| 1.224.142 | komada lakog i ličnog oružja u BiH |
| 1.098.762 | komada u posjedu građana |
| 349.366 | komada legalno u posjedu građana |
| 749.366 | nezakonito posjedovanih komada oružja |

ostalih, fudbalski huliganizam i maloljetnička delinkvencija; manjinski povratak, te terorizam i islamska radikalizacija. Vjeruje se da policije ne bi prve uzele oružje da brane su-

narodnjake, nego bi prvo pokušale da održe javni red, ali je moguća, pod dovoljnim pritiskom, podjela i policije i vojske po etničkim linijama. To bi mogao da bude sastojak u nes-

tabilnoj mješavini faktora: političara, kantonalnih i entitetskih sigurnosnih snaga, organizacija veterana i privatnih sigurnosnih firmi.

E. HEĆIMOVIĆ

**POLITIKA I MEDIJI**

Političke elite i većina medija su aktivno sudjelovali u radikaliziranju političkog i javnog diskursa u BiH u protekle tri godine. Analiza ukazuje na sve učestalije dovodenje u pitanje same države BiH

EKSPERTI EU I EVROPSKE KOMISIJE U BiH

Dautbašić optimista

U BiH danas počinje prvi postmonitoring Delegacije eksperata EU i Evropske komisije za praćenje situacije, nakon stupanja na snagu vizne liberalizacije. Eksperti će se susresti sa predstavnicima relevantnih domaćih vlasti u Sarajevu, Istočnom Sarajevu, Doboju, Zenici, Banjoj Luci i Brčko distriktu, te na kraju misije informisati predstavnike bh. vlasti.

- Mehanizam za praćenje dešavanja nakon liberalizacije viznog režima je uspostavljen odlukom kojom su građani BiH dobili bezvizni režim, kao što je to slučaj i sa drugim zemljama u regionu. Ovo je prva misija u okviru mehanizma za praćenje dešavanja nakon liberalizacije viznog režima, koju sačinjavaju eksperti zemalja članica EU i predstavnici Evropske komisije. Eksperti će procijeniti provođenje i razvoj reformi koje je usvojila BiH u vezi sa zahtjevima vizne mape puta, rekla je Zora Stanić, glasnogovornica Delegacije EU.

Bakir Dautbašić, sekretar Ministarstva sigurnosti BiH i šef monitoring-tima zaduženog za praćenje primjene bezviznog



režima, kaže da je “apsolutni optimista” po pitanju nalaza eksperata iz EU.

- Prošlosedmični podaci, konkretno iz Belgije, pokazuju da opada broj osoba iz BiH koje su zatražile azil u toj zemlji. Brza reakcija nadležnih po ovom problemu je urodila plodom i naši građani su shvatili da je traženje azila bez efekta, dodaje Dautbašić.

Vijeće ministara BiH ovlastilo je jučer državnog ministra sigurnosti Sadika Ahmetovića i Radnu grupu za liberalizaciju viznog režima da upoznaju članove monitoring-tima eksperata zemalja članica EU i Evropske komisije s Akcionim planom i mjerama za sprečavanje ilegalnog ulaska migranata iz BiH u zemlje EU.

M. Đ. R.

IZETBEGOVIĆ S BORCIMA

**Riješiti slučaj Vrbanja**

Član Predsjedništva BiH Bakir Izetbegović primio je jučer predstavnike udruženja proisteklih iz odbrambeno-oslobodilačkog rata iz Bugojna, prenosi Fena. Predstavnici navedenih udruženja su izrazili zabrinutost neizbalansiranim pristupom Tužilaštva BiH procesuiranju predmeta ratnih zločina počinjenih u toku agresije na BiH u općini Bugojno. Istakli su da je od izuzetne važnosti da se u što skorijem vremenu procesuiraju odgovorni za zločine nad bošnjačkim civilima u naselju Vrbanja, kao što je to učinjeno u slučajevima zločina nad bugojanskim Hrvatima.

DENIS BEĆIROVIĆ

**Čestitka Martinezu**

Predsjedavajući Predstavničkog doma Parlamentarne skupštine BiH Denis Bećirović, povodom Dana državnosti, uputio je čestitku predsjedniku Kongresa Kraljevine Španije Joseu Bonou Martinezu, prenosi Fena. “Zadovoljstvo mi je da Vam, u ime Predstavničkog doma PSBiH i u svoje lično ime, uputim najiskrenije čestitke povodom Dana državnosti Kraljevine Španije. Dozvolite mi da iskoristim ovu priliku i još jednom izrazim nadu da će se saradnja između PSBiH i parlamenta Kraljevine Španije nastaviti razvijati na obostrano zadovoljstvo i za dobrobit naših naroda”, navodi se u Bećirovićevoj čestitki.